

四庫全書

集部

原書魚尾下卷次訛誤

欽定四庫全書

宋元詩會卷七十三

兵部主事陳焯編

許謙

字益之其先京兆人徙金華至謙方五世父觥宋
淳祐七年進士仕未顯以歿謙生數歲而孤世母
陶氏口授孝經論語入耳輒不忘稍長肆力于學
取四部書分晝夜讀之雖疾不廢既乃受業金履
祥盡得其所傳之與于是隨所誦讀輒有發明于
四書集註則著叢說二十卷于尚書則著叢說六
卷于詩傳則著名物鈔八卷其觀史有治忽幾微
蓋倣史家年經月緯之法起太皞氏訖宋元祐元

年司馬光卒之月備其世數原其興亡以為光卒則中原之治不可復興故附於獲麟之義以致意焉延祐初居東陽入華山四方來學者遠而幽冀齊魯近而荆揚吳越皆不憚百舍相從先後論薦于朝者章數十上鄉闈大比請司衡文皆莫能致學者視其安否為斯道之隆替焉卒年六十八世稱白雲先生由何基王柏金履祥至謙而道益著故推原統系者目謙為考亭之嫡嗣焉詩調平常端人正士之言正不必求諸新異也

遣興 五首

秋日常苦短秋夜不可闌葉鳴迅風晚蟲怨零露寒月
白天炯炯振衣起盤桓山川出浮滓翳彼明不完幽興

中道絕百感來無端何當誅豐隆致身無羽翰清光亦
何私不照方寸丹

猗猗澧有蘭馥馥沅有芷獵獵石上蒲泛泛水中芙蓉
鮮三徑菊旒旒百晦蕙采掇集衆芳粲爛成雜佩佩服
何所從將以待君子

蓬生衆麻中不扶能自直寒窗效蠹鑽孤陋寡聞識古
來貴尚友萬善在熏炙古人不可見今人豈易得千載
遙相思空使我心惻

春風榮衆芳，秋露悴百草。羲和策日月，急疾兩飛鳥。枯
桑號天風，俛仰波浩渺。氣流物隨化，金石不自保。人生
寄蜉蝣，時邁胡不老。天地有終窮，微渺何足道。

乾坤無停運，清氣日夜生。人居覆載間，所息能不萌。握
機養天和，持守如捧盈。得喪固有命，寵辱何足驚。一身
磐石重，萬鍾浮雲輕。丈夫有志願，誰謂吾無成。

詠懷

朔風漠沙白，瘴日越荔丹。出門萬里道，爭似二頃田。拜

塵素所薄知命復何言鄙夫競聲利石火寒無煙清風
桐江水捷徑終南山丈夫時用舍所貴無此顏得喪固
一瞬芳臭俱百年坦途有覆轍窮哭誰復憐乾坤渺無
際我身蠹其間浩氣貫元化漸著豈不闕見可乃合道
行險祇自殘平生作霖志詎有懷土安風雲有嘉會時
至客何難君看激海鵬振翮青霄端

酬潘明之

鴻鵠凌霄青霄燕雀巢白屋凌霄志寥廓巢屋亦云足故

人渺天涯歲月如轉燭昔為交手歡今成斷腸曲
嵩華日以高江漢日以卑道異謀不同何用傷
別離書成情未盡路遠夢更迷相思溪水頭猶如送君時

題曹提領湘靈廟聞樂見燈詩卷

重華陟遐方馬斃車折軸娥英失所天往殉行且哭黛
凝衡山雲淚染湘江竹夫君不可見異穴嘆同穀廟食
三千年境土惠徼福事久竟忘哀幻化驚耳目音響鈞
天和光景清夜燭誰能寫新聲如彼涓在濮

贈江行父

二首

有朋遠方來傾蓋語已契紛紛燕雀間聽此孤鶴唳中
局湛淵水窺測渺無際接人氣雖和自律言頗厲為言
君子交相與期晚歲珠玉生光輝顧我形頗穢

海為百川歸流派各有源清濁豈不異皆可觀其瀾威
儀動三千意象非一端要知霄壤隔乃在毫釐間畢公
勤小物垂訓古不刊

賴川趙璉從予遊逾二載於其行書以贈之

宵漏四十餘疾急不可駐役夫昧昏夜戍柝迷夙暮商
頌歌悠揚未足發歸趣竹徑流疎螢萋萋瀉清露咿伊
遠雞鳴蠅聲無乃誤

送李榮甫知事遷淮西

淮水出桐柏浙江發東陽期會至滄海千里遙相望源
澄撓不濁水德固可量願將此清泠溥施彼一方

放牛圖

木葉紅欲落野草青未枯健犢起跳浪脫桎行江隅牧

人善防閑為擇牧與芻母牛徐掉尾煦嫗鳴相呼阿童
得所託靜中樂華胥豈惟置蓑笠乾坤一蘧蔭苟能物
付物拱默湛如愚

思遠樓

玄樓矗城端簷影墮水涯憑闌對堤草鳴櫓飛浪花舊
聞會昌湖一望十里賒藩籬孰定地相入如犬牙河間
尋丈波僅可通行槎芙蓉已銷落寒水浮枯葭佳景不
及遠興思重咨嗟夫人各有思所異正與邪潮汐蕩瀉

薄鄭衛生淫哇君子善發慮身通心則遐徘徊興未已
古木啼昏鴉

中州龍翔興慶寺

孤嶼浮中川晝夜汨潮汐何年地維裂中斷洲渚失兩
峰峙東西蔽影互朝夕浮屠據稜層梵宇絢金碧飛龍
迫風雷曾此一憩息昔時桂栢居今作大士室了師擇
靈地為假蛟鼉窟聚沙合舊港連亘如片石山扉夜無
闕神物便入出亂流攜故老一一訪陳迹軒亭倚葭葦

濤浪倚几席豫章號淒風篠蕩翳寒日憑高慨今古天
海相蕩激景在人已非悠悠意何極

暮過東津館

薄暮下通津灘急舟劇箭漁燈互明滅隴月時隱見清
颼從東來涼風襲我面目送兩山青天長淨如練

遊鍾山至八功德水

悠悠鍾山雲朝夕碍我目褰衣試一往行與雲相逐驅
馬出東門十里至山麓幽人昔已古誰能繼芳躅猿鶴

乘古林鼃鼃嘯深木彼哉西方人胡為擅斯谷豈云事
幽栖政爾炫華屋泓泉挹何德濁熱供一沃巖回屐欲
倦小憩倚脩竹涼颼自披襟佳興亦云足

舟中雜興

三首

冉冉江上蘆離離路傍草霜露侵衣裳何用涉遠道鴻
雁方有序孤飛在林表豈不顧其羣長風翮難矯

亭亭嶺上雲玄鶴相與飛俛啄戀故巢不得從雲歸秋
風颺黃葉飄飄各何之羸糧事遠遊在昔聞斷機栖鳥

辭茂林徘徊更依違悠悠兩江水共此明月輝

嵐烟紫崔嵬波光滉漾星宿縣虛蓬雲雨暗逸漿震
澤商氣深雄風駕濤浪白鷗與蒼雁來往同簸蕩吳潮
海門濶飛雪噴秋響重重越山迎汨汨溪流上舟行歷
旬日佳景閱萬狀孤征挹結思所感重悽愴安得同心
人詠歌共清賞

送胡秋白衢州學正

東陽有佳士簪盍鍾山下摛文集風雲論事共樽罍為

言諸孫行二妙皆作者有懷不可見情若江流瀉今此
逢少君秋月澄霽野儒術久不振屏棄如土苴泮林雖
儲材櫟棘亂梧櫟固當距詖行扶植歸大雅太末古名
邦生才今豈寡善性水同趨範模待良治

採藥

亭亭北山松宿靄蔭深碧蒼根走虬龍巨幹盤鐵石平
生梁柱材不受霜雪厄兔絲得所附裊裊挂千尺流脂
入九地千歲化琥珀我欲掇其英俯仰費搜摘紅爐轉

丹砂石髓變金液但恐茫昧間圖驥不可索意長時苦
促雙鬢日夜白刀圭或可試習習在兩腋蓬萊三萬里
詎謂弱水隔他時來山中故老應不識

種松

青松如秧針植在山之蹊豈惟娛心目歲寒以為期未
飽雨露恩那識廟廊姿蓬萊塞三徑埋沒誰復知秋風
隕百草秀色不少衰雖然咫尺根已見佳種奇君看二
十年腰大數十圍雪霜挺堅操雲漢擎高枝時有白鶴

來凡鳥那堪棲兔絲與凌霄冉冉相附依青松本貞固
不逐衆物移大器固晚成何用嫌暮遲願言堅汝節
勉待歲時

對竹

主人樹脩竹近在桃李場賦性雖不同相友庸何傷
陽春被桃李紅白爭低昂無言自成蹊相媚色與香何心
伴幽獨徒引蝶蜂忙此君心本虛寧逐春風狂咄嗟桃
與李開落那能常

寄友人

丹鳳止高岡衆鳥甘戢羽昂昂九皋鶴下土得所附江
南竹實多朝陽自軒翥延頸戛然鳴四顧失其侶豈不
念相從天濶無處所鳳兮歸何時恥與燕雀伍

秋日

秋風撼虛林秋水揚素波緩衣踞磐石怡盼庭樹柯芳
景良可惜去日亦已多天寒道路遠奈此兩鬢何興來
勿引酒醉飲空悲歌丈夫有志適慷慨捫太阿

酬潘明之

華亭谷深紫烟濕老鶴唳空眼垂碧功名千歲衣染墨
遼陽骨換今幾日華表時來語消息九臯胎化頂未丹
海門雲冷高飛難戛然長鳴飲清湍何當天風吹羽翰
方壺圓嶠同盤桓

遊龍回寺碧雲有何無適草書

蒼鱗作霖回壑裏竟化長岡飛不起何年老僧飛錫來
强架檐楹萬山底碧雲石梯如登天俯視竹樹行其巔

巖巒起伏呈怪狀壯若羣馬奔吾前何仙仙去不復返
滿壁龍蛇驚醉眼可憐一半委塗泥况復陷危湍苔蘚
山翁摸搦妙入神永和繭紙且逼真勸君勿辭一日力
為我留為百世珍君不見二王舊帖皆殘編至今不惜
千金傳

立秋日寄趙璉

蘭皋慘碧烟萋萋徘徊不忍竟與違欲窮目力望江水
江風故挾雙舟飛歸來復對呶呶者思才俯首西窗下

殿中駿足逐春風執策臨之盡凡馬拂硯挑燈披竹素
朝昏總是懷人處有時獨倚西南樓不見冥鴻北征路

送諸暨俞州判

北風蕭蕭吹江蘆清霜載道冰在鬚奚奴束書催上車
政成卷旆歸京都暨陽渺處天一隅里閭凋瘵煩爬梳
負戈攘臂衆暴寡探囊拊篋爭捐軀天民秉彜同好德
椎牛端為饑寒驅倅州寬惠別淑慝瘴惡豈必連妻孥
甘棠蔽芾有餘蔭百里寧謐無援桴存心忠孝本天性

為政固與常人殊壽昌自樂歸河中希文隱憂居江湖
白雲舍近畢至願青霄路迴寧躊躇

馮公嶺

層巒疊嶂危相倚亂若飄風湧秋水寒松荒草間蒼黃
照眼崢嶸三十里初如井底望天門一峰巍然中獨尊
縈回百折至絕頂俯視衆嶺來兒孫人言此山插霄漢
馬不容鞭僕夫嘆攀援何異蜀道難氣竭神疲背流汗
熟視徐行路覺平心寬意適步更輕志須預定自遠到

世事豈得終無成我來正值窮冬月倚杖巖前嚼松雪
午店烟生野飯香陽坡日近梅花發寄語悠悠行路人
乾坤設險君勿嗔胸中芥蒂未盡去須信坦道多荆榛

題姑蘇臺

姑蘇城上姑蘇臺青山百里蛾眉開平郊如掌思清遠
昔人樂極曾生哀大讐未復敵不死壯志消磨侈心起
會稽捷甲功自多種蠡深謀誠未已不知佳冶能傾國
暮暮朝朝醉春色勲臣抉眼視東門越女還為越人得

只今興廢總成空
惟餘碧草搖淒風
可憐千古臺前水
不洗當年甬東恥

友人招飲榴花下

憚風惡雨消餘春
春歸到處成清陰
萬枝濃綠幻春色
絳葩丹蕊俄森森
祝融行部過九地
誤縱炬火燒園林
艷妝炙日色更好
泠泠著雨紅尤深
浩歌相對作痛飲
有花為伴非孤斟
支頤半醉不成夢
恍惚錯錯供微吟
只愁明日便搖落
徘徊欲去還重臨
會須秋風折珠實

當載樽酒相追尋

放櫂行

安溪湖平行櫂多黃頭
豎兒倚櫂歌梅花照眼送寒色
酒暈著臉生春和炎涼世態翻覆手
江水長靜風吹波出門一笑天萬里
白鷗浩蕩如吾何

暮春郊外

行行多勝事石竇濺流泉
白鳥浮雲外青山落日邊
風平花委地野迴草連天
春事成牢落人生一夢然

遊智者寺

風景颼颼松陰繫紫騮白雲千載寺黃葉四山秋地
勝樓臺接林深虎豹遊人生自可樂此外復何求

蕭兄臨行索詩即席賦贈

相逢嗟久別歸路復怱怱我愧今原憲君非舊阿蒙山
風驚落木江日數飛鴻舟颺西流水明朝定向東

花溪道中 二首

板橋橫古渡村野帶平林野鴨寒塘靜山禽曉樹深雨

微風栗烈雲暗雪侵尋安道門前水清遊豈獨吟

天寒道路遠此去復何求適意真為樂浮生底用憂雲
容低野樹風力逆溪流喜見梅花笑相迎傍驛樓

浦川方仲觀入城從學繼入公門今歸侍親求詩
百里來為學違親半載餘暮雲飛故里秋露浥行車紅
葉蟬聲老黃花雁影疎漢朝尊吏事何必業詩書

秋夕

月落窗仍暗燈殘卷未收家人催杼柚穉子數更籌冷

露蟲搏夜淒風樹怯秋百年一瞬目萬慮幾搔頭

過太湖

周迴萬水入遠近數州環南極疑無地西浮直際山三
江歸漢表一徑界河間白浪秋風疾漁舟意尚閒

贈王斗山

骨肉斯文氣味投春風芹藻憶同遊故人別後無青眼
此日相逢盡白頭匣劍光橫南斗夜鳳梧陰冷峴山秋
惟應且試連鰲手未許江干下直鉤

三月十五夜登迎華觀

夜深來此倚欄干，千里樓臺俯首看。
月到中天花影正，露零平地草光寒。
氣清更覺山川近，意遠從知宇宙寬。
長嘯一聲雲外落，幾家兒女夢初殘。

青田大鶴洞

榕影扶疎路九回，仙家那復著塵埃。
山間田在牛終隱，石上巢空鶴下來。
丹竈無灰惟白草，劍鋒遺跡自蒼苔。
洞中道士今何處，三扣雲關杳莫開。

西山萬象寺

亂峰盡處接浮雲東望悠悠萬事陳
百里江流縈縹帶滿城居室比魚鱗
野僧倚竹嘯留客山鳥穿林啼喚人
落日亭中一杯酒何年復此對晴春

九月十七日登清涼寺翠微亭故址

梵宇崢嶸枕上頭倚風極目立荒丘
黃花覆地初經雨白雁橫雲遠帶秋
城郭已非山故在江淮失險水空流
衲僧八十仍多病收淚殷勤說故侯

次韻王中齋登拱翠樓

曾醉危樓坐石坡，彈箏擊缶醉婆娑。
蓬飛已改流年鬢，木老猶存舊日柯。
紅樹參差秋水遠，碧山高下夕陽多。
此時還縱西風眼，共倚闌干起浩歌。

秋暮有懷

十二欄干倚翠微，露華寒重逼羅衣。
碧天連水思空遠，衰草滿庭人未歸。
秋雨樓臺幾寂寞，春風院落自芳菲。
冥鴻應有青霄侶，為隔閒雲尚獨飛。

即席用蘇世賢韻送郭子昭 二首

攬轡春風入駿蹄
兩堤烟柳護晴溪
黃鶯自有留人意
相對殘紅不忍啼

落花高下弄菲菲
多少離愁付笛吹
別後故人休忘却
與君重賦渭城詩

宋 无

字子虛吳郡人明高季迪評其詩澹蕩道逸
于虞楊范揭外別樹一宗蓋欣賞之至也

公莫舞

公莫舞公莫舞鴻門王氣歸真主何人睚眦赤龍子手
循玉玦目相語令公莫舞公楚舞劍光射日白虹吐人
發殺機天不與撞斗帳中唉亞父霸業明朝棄如土

妾薄命

雲母屏瑤春冰鮫女織綃蟬翼輕比妾妾薄命比君君
薄情紅綿拭鏡照膽明還疑妾貌非傾城傾城從來有
人妬况復君心不如故故人心尚峰九疑新妾那能無
故時補天天不高填海海不深不食蓮葍不知妾心

烏夜啼

露華洗天天墮水燭光燒雲半空紫西施夜醉芙蓉洲
金絲玉簧咽清秋鞦鼓鞭月行春雷洞房花霧酣不回
宮中夜夜啼棲烏美人日日歌吳歎吳王國破歌聲絕
鬼火青熒生碧血千年壤塚穴孤兔烏銜紙錢挂枯樹
髑髏無語滿眼泥曾見吳王歌舞時烏夜啼啼為誰身
前歡樂身後悲空留琴怨傳相思烏夜啼啼別離

南峰宴坐僧

空出槁木形入定掩松局鵲供銜來果猿看誦罷經雲霞埋衲重苔蘚上鞋青只有樵人識曾因採茯苓

銅陵五松山中

樵聲聞遠林流水隔雲深茅屋在何處桃花無路尋身黃松上鼠頭白竹間禽應有仙家住避秦來至今

沙上

四望無邊際中浮一片沙人居釣艇官賦種蘆花渚綠紅蒿短江清白鳥斜垂流欲東去萬里寄生涯

寄題無照西園

近地棲禪室祇園草木薰鞋香花洞雨衣潤石欄雲松
吹和琴雜茶烟到樹分遙知道林輩來此論玄文

建業閒居春思

杜曲芳菲早江城店舍烟雨青榆莢地風白柳花天愁
結丁香上醒餘禁酒前病多遊冶少春事亦留連

大滌山道士

童顏幾寒暑編葉當衣裳琴古面如漆柏枯身有香樹

精為老僕石髓作乾糧不語坐松下天風吹髮涼

送陳衡中之越

見說會稽郡風流如晉時貧惟將母去清不要人知脩
竹王猷宅春風夏禹祠到官遊有暇好寄剡中詩

金陵送倪水西之江陵

楚江江上暮雲東萬里春波去意濃桃葉歌殘秣陵酒
梨花夢斷景陽鐘沅湘水落瓊瑤合巴蜀山來錦繡重
回雁峰前見歸雁相思何處再相逢

秣陵晚眺

天塹鴻流擁積沙，石城虎踞漫雄誇。
山林青草六朝地，巷陌烏衣百姓家。
紫蓋黃旗消王氣，瓊枝璧月弔庭花。
孤雲更作降幡勢，目斷樓船日又斜。

公子家

朱門當道擁高牙，拂曉鳴騶散乳鴉。
紅叱撥驕金匱匣，黑崑崙點解琵琶。
姬持銀蠟燒明月，犬帶金鈴臥落花。
不信銅駝荊棘裏，百年前是五侯家。

秋日垂虹亭

滿袖玉皇香案烟綵霓背上俯晴川紅黃霜樹珊瑚海
黑白雲花玳瑁天京圃空離樓十二丹墀罷對字三千
吟毫醉蘸吳江月寫與騎鯨李謫仙

春日野步書田家

翳日惝陰翠幄遮封園高下奕枰斜陂塘幾曲淺深水
桃杏一溪紅白花頰尾自跳魚放子綠頭相並鴨眠沙
春郊景物堪圖寫輸與烟樵雨牧家

客燕雨懷

薊門飛雨布袍泥遊子魂消幾夢歸賦有聲華羞狗監
淚無氣概晒牛衣客愁萬斛添杯量春瘦三分減帶圍
不似江南烟艇小柳花如雪荻魚肥

許山人宅

桐君種藥隱衡皋竹祖生孫共養高茶脚碧雲凝午枕
酒聲紅雨滴春槽休糧貌古添清瘦餌朮身輕長綠毛
仙詔未頒遲拔宅家資猶戀一溪桃

春日病起

壯懷玉具劍空攜老去金門獻賦遲
服藥身軀多病日
養花天氣半陰時
愁鄉塵積瑤琴嶽夢境寒生翠被池
春事幾何公事急劇憐蝴蝶挂蛛絲

無題

妝淺顰深凭綺疏
小郎新拜執金吾
絃中言語分明怨
袖上腰肢準擬扶
翠履駕寒慵鬪草
紅牙馬暖罷撈蒲
無人商略心頭事
私向花前卜紫姑

毛遂

兩國從衡倚諍臣誰為脫穎出囊珍縱饒得與銅盆歆
十九人皆碌碌人

王蠋

全齊拱手受燕兵義士能為國重輕七十二城皆北面
一時攄憤獨書生

甘羅

函谷關中富列侯黃童亦僭上卿謀此時園綺猶年少

甘隱商山到白頭

通子

但覓家中梨栗嘗不拈紙筆學文章
乃翁臨老投蓮社解舉籃輿亦自強

綠珠

紅粉捐軀為主家明珠十斛委泥沙
年年金谷園中燕銜取香泥葬落花

李三郎

獨跨青驄棧閣間
華清休憶夜鳴鸞
空教萬馬盤旋舞
不濟崎嶇蜀道難

關盼盼

妾未成灰鬢已霜
啼紅十載唾茸窗
香魂若作樓中燕
一世孤飛不肯雙

泰娘

太守風流寵泰娘
歌成樂府屬劉郎
一般女子皋橋住
底事無人詠孟光

馮道

亡國降臣固位難癡頑老子幾朝官
朝梁暮晉渾閒事更舍殘骸與契丹

西湖

故都日日望迴鑾錦繡湖山醉裏看
戀著銷金窩子帳龍沙忘却兩宮寒

漢宮

武帝昇霞玉殿空金人夜泣月明中
可憐嬪御無行幸

猶費丹砂飼守宮

金陵懷古

宮甑賣盡雨崩牆
首宿秋紅滿夕陽
玉樹後庭花不見
北人租地種茴香

長信秋

長信秋來月自圓
夜香猶拜玉階前
妾今不願君王寵
惟願君王壽萬年

山中僧

雪頂霜眉齒半稀
跣趺苔石看雲歸
山童掃葉鶴飛起
狼籍松花滿衲衣

玉環病齒圖

一點春寒入瓠犀
海棠花下獨頻眉
內厨幾日無宣喚
不向君王索荔枝

游三茅華陽諸洞

書滿琅函閉不開
雲窗霧閣鎖青苔
門前白鹿將麋過
定是避秦人引來

客夜思親

老妻病女去淮西
慈母居吳鶴髮衰
我獨天涯聽夜雨
寒燈三處照相思

春歸

釀蜜筒香蜂報衙
杏梁泥歇燕成家
浮萍斷送春歸去
盡向風流載落花

髮白解嘲

吳霜兩鬢早先秋
聞道愁多會白頭
谿上鷺絲渾似雪

想應無那一身愁

西湖書所見

綠闌干護水鱗鱗
蘇小門前柳弄春
聽得語聲嬌不見
隔簾佯喚賣花人

長卿

一病文園渴思深
祇應惆悵為鳴琴
老來減盡凌雲氣
却賦長門易酒金

春風

東風吹綠上汀洲染出江南一片愁長到春來問芳草
不知何地可忘憂

老將

殺氣消磨暗鐵衣夜看太白劍無輝舊時麾下誰相問
半去封侯半不歸

老馬

瘦蹄生入玉門關病放沙場戰骨閒歸甞殘芻應有淚
將軍頭白戍天山

春愁

金雁塵香暗鳳絃紅繩風緊閣秋千園林寂寞無鶯燕
一段春愁是杜鵑

蘇爾約蘇哈雅

字浮岑號酸齋輝和爾人阿爾哈雅孫也父名袞格
根初以貫為氏酸齋生而神采秀異膂力絕人年
十二三時使健兒驅數生馬疾馳已持槊立道上
待馬至騰上之越一跨三運槊風生觀者辟易及
長折節讀書仁宗朝拜翰林學士忽興退隱之思
移疾居江南賣藥錢塘市中詭姓名易衣冠人無
識者詩清麗尤工樂府同時有徐甜齋並以詞曲
名世而酸齋淡情榮利早賦遂初其志趨尤為難

及

桃花巖

白兆山桃花巖太白有詩近人建長庚書院來京師
時中書平章白雲相其成求詩於詞林李秋谷程雪
樓陳北山元復初趙子昂張希孟與僕同賦

美人一別三十年思美人今在我前桃花染雨入白兆
信知塵世逃神仙空山亭亭伴朝暮老樹悲啼發紅霧
為誰化作靈輿區十丈風烟挂淮浦神遊八極栖此山

流水杳然心自閒
解劍狂歌一壺外
知有洞府無人間

美人篇

仙風雕雪玲瓏溫
吳姬剪月纖纖昏
行雲補髻翠光滑
鳳凰叫落空山月
手摘閒愁八字分
春山恨重畫不伸
肌濃汗膩朱粉勻
背人揮淚妝無痕
霜刃自裂石榴裙
閉門不識諸王孫
綠烟熏透藍田玉
羅帶隨風換妝束
飛鳥銜怨過長門
芳菲暗綴韶華屋
錦香帳冷蘭燈沈
落花不入芙蓉衾
三山路杳銀河深
彩鸞高訴愁人心

君山行

北溟魚背幾千里負我大夢遊弱水蓬萊隔眼不盈拳
碧落香銷吹不起茜裙女兒懷遠遊遠人不歸明月羞
寶釵綰髻翠欲流風鬟十二照暮秋女媧煉石補天手
手拙石開露天醜瓊樓玉宇亦人間直指示君君見不
斯須魚去夢亦還白雲與我遊君山

別離情

吁別離之苦兮蒼梧之野春草青黃陵廟前春水生日

暮湘裙動輕翠玉樹亭亭染紅淚又聞垓下虞姬泣斗
帳初驚楚歌畢佳人閣淚棄英雄劍血不銷原草碧何
物謂之別離情肝腸剝剝如銅聲不如斫其竹翦其草
免使人生為情老

采石歌

采石山頭石潁色采石山下江流雪行客不過水無跡
難以斷魂招太白我亦不留白玉堂京華酒淺湘雲長
新亭風雨夜來夢千載相思各斷腸

蘆花被

僕過梁山泊有漁翁織蘆花為被僕尚其清欲易之
以紬者翁曰君尚吾清願以詩輸之遂賦果却紬
採得蘆花不浣塵翠衰聊復藉為裯西風刮夢秋無際
夜月生香雪滿身毛骨已隨天地老聲名不讓古今貧
青綾莫為鴛鴦妬欸乃聲中別有春

鳳凰山

路隔蒼苔卒未通泉花如髮玉濛濛蛟浮海近雲窗濕

蚊怯山寒葛帳空
高枕不知秋水上
開門忽見暮帆東
物華萬態俱忘我
北望惟心一寸紅


秋江

澄淨秋江一舸輕
不堪蹤跡想平生
西風兩鬢山河在
落日滿船鴻雁聲
村酒尚存黃閣醉
短檠猶照玉關情
料應今夜還鄉夢
殘葉蕭蕭月二更

蒲劍

三尺青青古太阿
舞風吹碎一川波
長橋有影蛟龍懼

流水無聲日夜磨
兩岼帶烟生殺氣
五更彈雨和漁歌
秋來只恐金飈惡
銷盡鋒稜恨轉多



宋元詩會卷七十三

欽定四庫全書

集部

宋元詩會卷七十四

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣王鍾泰

謄錄監生_臣張 鈞

謄錄舉人_臣龐兆懋

欽定四庫全書

宋元詩會卷七十四

兵部主事陳焯編

虞集

字伯生宋丞相允文五世孫也宋亡父汲以黃岡尉罷職僑居臨川宗仁與吳澄為友娶國子祭酒楊文仲女文仲守衡為汲禱於南嶽而生集集三歲即知讀書母楊氏口授諸經輒能闇誦及就外傳則凡宜習者皆已先通大義矣左丞董士選任南行臺中丞延集家塾大德初用薦授大都路儒學教授遷國子助教時吳澄為司業於學制欲有所更張集力贊之會有為異論者澄投劾去集亦

以病免未幾除太常博士丞相拜珠從集問禮器
祭義歎息久之益信儒者為有用遷集賢修撰翰
林待制國史院編修官仁宗嘗對左右曰儒者皆
用矣惟虞伯生未顯擢耳英宗即位集以丁艱南
歸遣使召入泰定初除國子司業秘書少監帝每
幸上都命集與王結執經以從拜翰林直學士俄
兼國子祭酒文宗立命集仍兼經筵除奎章閣侍
書學士有旨修經世大典命集與趙世延同任總
裁再閱歲乃成以目疾辭職不允馬祖常為御史
中丞欲集薦其所以知集拒之祖常不樂文宗崩集
在告謀歸弗果幼君繼崩大臣將立托歡特穆爾
太子祖常使人告集曰御史有言矣遂謝病歸臨
川蓋文宗在上都日將立其子為太子而引托歡
特穆爾乳母夫言明宗在日自言太子非其子俾
集書詔播告中外故御史諷集速去然順帝顧心
知之侍臣有言及此者輒不懌曰此我家事豈由

彼書生耶至正八年卒年七十有七平生為文萬篇藁存者十僅二三嘗題其書室曰邵菴故世稱邵菴先生云

赤城館

雷起龍門山雨灑赤城觀蕭騷山木疎浩蕩塵路斷魚龍喜新波燕雀集虛幔開戶微風起倚杖衆雲散

同閣學士賦金鴨燒香

黃金鑄為鴨焚蘭夕殿中窈窕轉斜月逶迤動微風綺席列珠樹華燈連玉虹無眠待顧問不知清夜終

題儋耳東坡載酒堂

翳翳儋耳城歷歷枕椰樹百年遺故丘新堂設賓阼清
風海上至朝陽在庭戶丹山五色鳳覽德屢來下甘辛
熟桂酒羅列雜諸籟符黎多子孫食飲祭先具蛟龍波
浪深歸來風雨遽

賦茅山道士雲松巢

昔年李供奉廬山思結巢褰雲自天上和鶴止松梢道
士潘閒遠高居古大茅誦經門臥虎看劒石眠蛟飛步

脫鳬舄長吟吹鳳匏九江攬秀色許爾作神交

上京有感

翰音迎日轂儀羽集雲路寂寞就書閣老大長郎署為
山望成岑織錦待盈度我行起視夜星漢非故處

寄子昂

春風動崇蘭庭戶光陸離言收竹上露石角挂練衣車
行不擇路茅茨何楚楚遊子憺忘歸徘徊歲云暮

至治壬戌八月十五日榆林對月

日落次榆林東望待月出大星何煜煜芒角在昂畢草
樹風不起蛩蛸絕啁唧天高露如霜客子衣盡白羸驂
斲餘棧嫠婦泣幽室行吟毛骨寒坐見星河沒驛人告
晨征瞳瞳曉光發

題商德符華山圖

昔祠雲臺館行穿御階柏夕陰嵐氣深重碧照行客獨
訪張超谷漸覺岩險迫冰生玉井頭日射仙掌側豈無
鐵鎖縣翻身若飛鵲恐煩華陰令不奈昌黎伯王事况

有程車馬何忽忽流觀終南山周覽天府國爾來十七
年欲往不再得山河想邈悠傷殘轉蕭索摩挲商老圖
彷彿希夷宅高哉蓮華峰白雲澹秋色

送張兵部孟功巡河分韻得屋上烏

花發上陽春門開未央曙城柝起羣栖流光散朝羽息
影須近檐結巢願當戶輓轡轉金井終日濯嘉樹

書上京國子監壁

神京極高寒幽居了晨夜雷風無時發零雨每飄灑炎

光不到地蕭爽度長夏大化漠無宰豈必事陶冶揚雄
不曉事守道棲棲者玄經百無徵白髮謾盈把

酬上清道士鈔陰何詩

殘雪松上落輕冰硯裏生寫詩過半夜歌枕又天明少
陵愛何遜太白侶陰鏗不愁勞弱翰亦足助高情

題水木清華亭

中流汎蘭柁望彼嘉樹林落日蕩野水浮雲生夕陰魚
游戀芳藻鳥鳴在幽岑為樂恐易老吾將脫朝簪

白翎雀歌

烏桓城下白翎雀雌雄相呼以為樂平沙無樹託營巢
八月雪深黃草薄君不見舊時飛燕在昭陽沈沈宮殿
鎖鴛鴦芙蓉露冷秋宵永芍藥風暄春晝長

寫廬山圖上

憶昔繫船桑落洲洲前五老當船頭風吹雲氣迷谷起
霜隊楓葉令人愁高人祇在第九疊太白一去三千秋
石橋二客如有待裹茶試泉春巖幽

吳郡陸友仁得白玉方印其文曰衛青臨川王順
伯定以為漢物求賦此詩

將軍騎從公主時豈意刻玉為文章珠襦已隨黃土化
此物還同金雁翔軍中只識長平侯西風木葉茂陵秋
人生卑微何可忽碌碌姓名誰見收

題灤陽胡氏雪溪卷

積雪平沙山陰道射虎殘年不知老豈識船如天上坐
翠竹為帷樹為葆昔乞鏡湖苦不早白髮如絲照清潦

他年此地若相逢應著漁蓑脫貂帽

金人出塞圖

海風吹沙如捲濤高為陀磧深為壕築壘其上嚴周遭
名王專居氣振豪肉食湏飲田為遨八月草白風颼颼
馬食草實輕骨毛扣弦試弓復置橐今日不樂心慄慄
什什伍伍呼其曹銀黃兔鶻明繡袍鷓鴣小管隨鳴靴
背孤向虛出北皋海東之鷲駟不驕錦鞬金簇紅絨條
按習久蓄思一起是時皓清天翳絕駕鵝東去雲帖帖

去地萬仞只一瞥離婁屬望目力竭微如聞音驚上掣
束身直去不回折遂使孤飛入片雲頃刻平蕪洒毛血
爭誇得雋頓足悅旌旗先歸向城闕落日悲風起蕭屑
烟塵滿城鼓微咽大戶要王具甘歆王亦欣然沃焦熟
關支出迎騎小鐵琵琶兩姬紅顴頰舞歌迭進醉燭滅
穹廬斜轉甕觥月

為達兼善御史題墨竹

蜀道荒涼多古木貧富千丈相因依少年慣見今白髮

杜宇夜啼愁不歸老可嘗作陵州守古墨蛟龍多入手
春雷每恐破壁去神鼎空令夔魃走丹丘越人不到蜀
脩葉何以能縱橫內府人家爛漫寫使可見之心亦驚
江南御史龍頭客暫別那能不相憶知君深識篆籀文
故作寒泉溜崖石

子昂墨竹

吳興畫竹不欲工腕指所至生秋風古來篆籀法已絕
止有木葉雕蠶蟲黃金錯刀交屈鐵大陰作雨山石裂

蛟龍起陸真宰愁雲暗蒼梧泣湘血吳興之竹乃非竹
吳興昔年面如玉波濤浩蕩江海空落月年年照秋屋
題花鳥圖

吳中女兒顏色好洗面看花花為悄調朱弄粉不自施
寫作窗間雪衣鳥綠窗沈沈春晝遲半生心事花鳥知
花殘鳥去人不歸細雨梅酸愁畫眉

畫鶴

薛公少保昔畫鶴毛羽蕭條向寥廓通泉縣壁久微茫

故物都非況城郭長鳴濶步貌閒暇解寫高情亦竒作
田中芝草日應長石上松花晚猶落赤壁江深孤月小
白雲野迴秋霄薄羣帝相從絳節朝八公許製黃金藥
誤嬰塵網跡易迷移召中州夢如昨借懸素壁憶真侶
忽有微風動林壑碧虛寥寥積雪高直過蕭臺絕栖泊

林皋亭

九月天氣肅鶴鳴在林陰使君甚好客來者總能吟紅
樹秋山近黃華夕露深鄰翁八九十有酒即相尋

送先隴二鄰僧還吳二首

蘭若背山陰松筠夾逕深
門閒容虎臥湖近聽龍吟
雨過泉添潤風飄磬出林
衲衣皆舊識一一謝幽岑

東嶺憶招提幽尋日未西
過山隨虎跡倚石待猿啼
雲外催歸錫松間覓舊題
卜鄰吾欲老毋惜伴扶藜

雪谷早行

積雪擁柴門行人稍出村
溪頭或遇虎木末不聞猿
接棧迴山閣支橋就樹根
驅車上重坂回首見朝暾

送人之劔閣倅

往年登劔閣騎馬著春衫設險懷前賦摩崖覓舊鄉
人遊雪界郡倅試冰銜歸道觀新政春江不挂帆

漫興

雨閣添衣潤風簾隱几高白頭更事少病目向書勞南
客傳音信東家問酒醪江邊茅屋破歸楫若為操

寄丁外進士薩天錫

江上新詩好亦知公事閒投壺深竹裏繫馬古松間夜

月多臨海秋風或在山玉堂蕭爽地思爾佩珊珊

送長沙守

白髮長沙守循良又好文近辭金馬去遠有玉魚分對
竹聽湘雨開簾看嶽雲漢庭思賈誼一飯莫忘君

寄莆田先生

縣榻塵生席深居晝下帷齊眉安饋食擁髻近歌詩藥
裏須漣乳書題憶荔支白頭吟更苦何必蜀人思

鄭谷圖

道士徐太虛生紙畫山居林壑春烟裏桑麻夜雨餘過
橋九節杖連屋一牀書似是子真谷歸耕三月初

題沈肩吾縣令贈行卷

縣庭都禁謁祇許見諸生接壤皆興學遊民亦願耕絃
歌居室迴山水畫圖清千載雲巖石能留令尹名

戲作試問堂前石

試問堂前石來今幾十年衰顏空雨雪幽致自風烟微
醉寒堪倚孤吟靜更眠舊湖春水長誰繫釣魚船

送魯子翬廉使之漢中

封上頒臺禮輕車入漢中
節毛吹渭雨水葉動秦風
把酒臺基古馳書歲事豐
朝回倚西閣日日數歸鴻

立春夜試墨

輕雪作春花飛來入鬢斜
紫貂迎曉霧絳蠟炫清霞
書詔頻趨閣思歸即借車
幾時將稚子隨意踏江沙

送王照磨之官雲南

遺廟珍珠浦歸舟轉道溪
飛鳶愁暑雨走馬畏山泥
宮

署尊丹鷺祠官勝碧雞題詩遠相送紅日五雲西

八月八日有感題視草堂壁

戴筆趨芸閣探囊索緼袍坐銷秋日淨心折夜風高識
字頭先白謀生計轉勞文園多病渴常想賜蒲萄

贈鐵菴道士 二首

昔遊雲臺觀山色上衣青松花春雨落柏葉秋露零饑
來煮白石睡起看黃庭人間忽已老莫問少微星

海上別妻子山中求茯苓白虎戲玄渚蒼龍護綠局燒

香招五老行厨庖六丁從子似非遠丹霞粲華星

送袁伯長扈從上京

日色蒼涼映赭袍時巡母乃聖躬勞天連閣道晨留輦
星散周廬夜屬橐白馬錦韉來窈窕紫駝銀甕出蒲萄
從官車騎多如雨祇有揚雄賦最高

代祀西嶽至成都作

我到成都纔十日駟馬橋下春水生渡江相送荷主意
過家不留非我情鷗鷺輕筏下溪足鸚鵡小窗知客名

賴得郢筒酒易醉夜深衝雨漢州城

贈星上人歸湘中

潭北湘花無影樹一花吹度海門潮
天香滿室足初起雲氣上衣身欲飄
寶月夜寒龍在鉢銀河秋近鵲成橋
豈無半箇邛州竹與爾松根共寂寥

歐陽原功待制入院後僕以兼領成均辰酉甚嚴
絕不得相見今夜當同宿齋宮賦此先寄并東

謝敬德修撰

學省初兼禁直稀故人同署卻相違
食餘首宿承朝日坐候棠梨過夕暉
預喜奉祠秋寺燭定知催襆早朝衣
今晨瘦馬經門巷想擁青綾尚掩扉

次韻張蔡國公淡菴青山寺詩

相國觀山負夙期聖恩祇許暫相違
身隨雲影留三宿心了泉聲絕百非
開士談空依寶樹野人耕雨薦山薇
雙龍深護安禪處繞坐諸天近紫微

題南野亭

門外烟塵接帝局，坐中春色自幽亭。
雲橫北極知天近，日轉東華覺地靈。
前澗魚遊留客釣，上林鶯轉把杯聽。
莫嗟韋曲花無賴，留擅終南雨後青。

賦碣山成簡御心遠亭

作亭臨河河水渾，草樹繞屋啼鳥聞。
夢回枕上彭城雨，目送檐間芒碣雲。
歸來黃菊有佳色，坐老青山無垢氛。
但願樽中長得酒，曲阿休問舊參軍。

次韻朱本初訪李旣之學士不遇

城南城北暖塵飛，伐木相求苦未歸。
吟到碧桃還細雨，行尋芳草又斜暉。
綺窗綵筆題詩徧，斗帳沈香入袖微。
共載小車馳紫陌，重遊莫待曉紅稀。

寄題子敬平章山居

聞道乘閒入翠微，猶愁嵐氣濕人衣。
道傍野樹飛花盡，溪上春雲作雨歸。
故舊釣絲輕在手，仙人棋局靜忘機。
赤松曾許同千載，擬向高秋傍鶴飛。

寄來鶴亭主人

二首

德清舊館何時到雨後春泉定滿池綠字久無弘景信
紫苔長應少霞碑數峰烟樹天垂野千頃鷗波雨散絲
海內交遊多老去為誰溪上放船遲

荔子枝頭火向紅高堂紈扇坐熏風湘筠簟冷魚波合
海柏梁深燕雨通絡緯豈知秋袂薄戾戾長憶曉餐同
入城來看花如錦誰道清霜解惱公

寫韻軒 二首

翩翩仙子藥王山明月高樓遂不還天外脩眉塵鏡掩

窗中遺墨夜燈闌雪深黃竹歸無所雨暗蒼梧淚更斑
何啻浮雲相契合官然餘迹謾人間

仙人本自好樓居深下重簾寫韻書江上數峰千仞表
硯中微露九秋餘下方鐘鼓塵初靜絕世文章事不虛
最愛夜涼天闕近綺窗留得玉蟾蜍

滕王閣

三首

高閣城頭戶牖開江中影見碧崔嵬文章誰復三王後
雲氣長從五老來畫角數聲南斗落白鹽萬斛北風迴

洲頭原有蛟龍窟怪得詩成急雨催

天寒江閣立蒼茫百尺闌干送夕陽歲久魚龍非故物
春深蛺蝶是何王帆檣星斗通南極車蓋風雲擁豫章
燈火夜歸湖上雨隔鄰呼酒說干將

危樓百尺倚闌干滿目青山不厭看空翠遠疑江樹小
落霞飛送酒杯乾千年劍氣侵牛斗半夜天香下廣寒
我欲乘鸞朝帝闕五雲深處是長安

贈僧一初

江頭說與老禪知玩水看山豈定期白髮自來無處所
黃花更老不嫌遲爐烟遶座寒留宿缺月窺禪夜誦詩
惟有峽中三石壑十年幾度見遊時

鐵柱宮

老翁無意弄新波化作鳧翁倚柱歌點石神方寧復得
沈沙遺戟不堪磨汾陰鼎鼎千年出海底珊瑚百尺過
誰在蓬萊期劫外下騎黃鶴一摩挲

按此詩初出人皆未喻其旨蓋言此柱未敢必為旌

陽之物故詩意皆設疑詞以問之。焯見鐵柱宮題
詠多矣惟道園與熊與可詩超出衆作以其不泥陳
跡也

神鳳琴

鳴鳥人間久不聞遺絃欲託斷琴紋曾看土鼓歌朝日
亦共陶樽醉夜分五色雲中迎太乙九疑山下望湘君
采詩應被唐風譜早晚樓船或祀汾

謝書巢送宣和瀘石硯

巢翁新得瀘州硯拂拭塵埃送老樵毀壁復完知故物
沈沙俄出認前朝毫翻夜雨天垂藻墨汎春冰地應潮
恐召相如今草檄為懷諸葛渡軍遙

題暖翠亭

老去唯思臥白雲一亭萬竹喜初聞波迴曉日鴛鴦並
沙散晴烟翡翠分把釣左泉歸衛女乘舟北渚望湘君
誰能獨采薇盈袖却道高寒思不羣

題張希孟中丞送畢中達提點卷後

十年七聘不還朝起為饑民夜駕輶嘉樹百年誰忍伐
生芻一束不能招西州華屋交遊少北海清尊意氣消
欲寫濟南名士傳泉聲山影晚蕭蕭

寄泉南三老人

春城連海樹扶疎中有幽人八十餘庾信流傳江左賦
伏生零落濟南書鄰翁社舞尊多酒弟子晨炊饌有魚
前代衣冠今絕少欲看三老載安車

甲戌四月十七日至臨川沖雲寺

郭西寺門雙石頭水檻相對林塘幽
白花過雨落松暝黃鳥隔溪鳴
麥秋衰朽虛蒙宣室問淹遲實愛小山留
為貧佛日同僧話滿袖香烟念舊遊

李伯宗錄詩

老去逢春祇謾吟敢煩彩筆為追尋
玉堂天上成塵夢茅舍山中稱野心
萬里雲霄歸鳥盡孤村風雨落花深
文章傳世知何用空使高情慨古今

鶴

予家有薛少保鶴圖一大軸先尚書自蜀攜至此邑
以為珍玩先參政晚歲失之不知所在當時極惋歎
今三十餘年集妻姪浚儀趙德莊從好事家重購得
之欲集識其故而藏諸篋笥為賦此

吾家舊物薛公鶴老氣崢嶸壓九皋鐵石鬪身脩足脰
雪霜依骨淺翎毛通泉久失千年壁杜甫空吟一世豪
老去思鄉歸未得時時借看倚秋高

費無隱丹室

碧雲雙引樹重重除却丹經戶牖空一徑綠陰三月雨
數聲啼鳥百花風年深不記栽桃客夜靜長留賣藥翁
幾度到來渾不語獨依秋色數歸鴻

寄澄湛堂

月中桂子落嵒阿想在林間閱貝多持足地神衣拂石
獻珠天女襪凌波香因結願留龍受水為烹茶喚虎馱
寄到竹西無孔笛吹成動地太平歌

賦雪洲

江上經年憶雪多長洲化作玉坡陀舊時射虎迷蹲石
薄暮歸漁認擁蓑河伯作宮龍獻璧湘靈遺珮鳳停梭
鳬鷺容與江花發更待春來生水波

送胡古愚

仙館醉餘千石酒上林吟遍百花風拾遺徒步頭雖白
供奉歸來錦更紅晚下紫薇憐病鶴春生綠水送冥鴻
故人江上如相見為借扁舟候禿翁

挽文山丞相

徒把金戈挽落暉南冠無奈北風吹子房本為韓仇出
諸葛寧知漢祚移雲暗鼎湖龍去遠月明華表鶴歸遲
不須更上新亭望大不如前洒淚時

贈無塵道人

雲霧為衣月作裳天壇獨自禮虛皇龍收古劍沈秋水
鶴識神丹起夜光金井有聲惟墜露玉階無色乍凝霜
無端下界松風動又欲飄然上鳳凰

王庶山水

蜀人偏愛蜀江山圖畫蒼茫咫尺間駟馬橋邊車蓋合
百花潭上釣魚閒亦知杜甫貧能賦應嘆揚雄老不還
花重錦官難得見杜鵑啼處雨班班

仁壽寺僧報生瑞竹

聞道故園生瑞竹令人歸興滿江干扁舟不畏瞿塘險
匹馬誰云蜀道難杜甫溪頭花匝孔明廟裏柏蘭珊
新堂題作歸歟字定得臨江把釣竿

還鄉

還鄉思速去鄉遲王事相縻敢後期里父留看題壁字
山僧打送捨田碑胡桃筇竹南方要盧橘枇杷上國知
此日君親俱在望徘徊三顧欲何如

正月十一日朝回即事

宮樹春陰合霓旌拂曙來天光臨閣道雲氣轉蓬萊晝
漏沈沈鼓晨樽灑灑杯香霏簾底霧樂殷殿前雷祥瑞
儀曹奏珍醇尚食催舞庭分鷺序効獻過龍媒融雪微
生草輕風不動埃老人南極至王母上方回玉色何多

喜金華得重陪裁詩賀新雨西閣待門開

御溝詩次宋顯夫韻

御溝雪融三月初鳬鷺鴻雁總來居蒲萄水綠可為酒
楊柳條青堪貫魚逶迤天河起箕尾滉漾雲海浮青徐
舟前花落傍飛燕隄上風來濕舞裾翠輦時留金騶裏
錦波不著玉芙蓉臨流宋玉偏能賦莫待東都客問予

宣和墨竹寒雀

洒墨寫明玕深宮春晝閒蕭條數枝雪不似紇干山

雙鴛圖

戢翼石梁陰，秋風日夜深。
使君莫行野，江水蕩人心。

題敬仲雜畫

三首

雨過黃陵廟，蒼梧雲正愁。
何時倚虛幌，對此滿林秋。
峽口春雲重，江南夜雨多。
水深桃葉渡，風急竹枝歌。
蒼涼初出日，黃落早知秋。
不遇采芝客，寧知叢桂幽。

青山白雲圖

獨向山中訪隱君，行窮千澗水沄沄。
仙家更在空青外。

祇許人間禮白雲

竹塢沙頭鷗鷺

蝴蝶飛來石竹叢
羅襦曾試繡文重
荷花啼鳥銀屏外
臥看窗間唾碧茸

題蔡端明蘇東坡墨蹟後

二首

祇今誰是錢塘守
頗解湖中宿畫船
曉起鬪茶龍井月
花開陌上載嬋娟

三生石上舊精魂
邂逅相逢莫重論
縱有繡囊留別恨

已無明鏡著啼痕

臘日偶題

舊時燕子尾毵毵重覓新巢冷未堪為報道人歸去也
杏花春雨在江南

題扇與周幹臣

玉疊松花密餅香龍珠星顆露盤涼遙知環碧樓中坐
翠竹蒼松夏日長

李孟

字道復潞州上黨人曾祖仕金祖父入元皆任外
職因徙居漢中孟七歲能文倜儻有大志談古今
治亂娓娓如親出其間至元中以事至京師中書
右丞楊吉丁一見竒之薦於東宮未及用成宗立
又因薦者用為太子師傳大惠元年武宗撫軍北
方仁宗留宮中孟日陳善言多所進益成宗崩安
西王謀繼大統國事幾危孟力佐仁宗定內難以
迎武宗功在社稷忽逃去不知所之至大二年仁
宗為皇太子侍帝同太后內宴從容述孟前事帝
感其言遣使搜訪得之特授中書平章政事集賢
大學士同知樞密院事仁宗嗣立以舊學委任益
專拜中書平章政事進階光祿大夫賜爵秦國公
親授印章孟辭國公印奏三上始允延祐元年進
金紫上柱國改封韓國公乞解政歸里許之英宗
立為姦相所構賴上保全讒不得行然猶奪其封
拜前後制命至治九年卒御史累章辯誣詔復原

官進封魏國
公諡文忠

進詩

十年陪顧問一旦決安危自合成功去應慚見事遲長
城何自壞孤注莫相疑辟穀求仙者高明百世師

曹元用

字子貞世居阿城徙汝上元用資稟俊爽幼嗜書
一經目輒成誦夜讀每達曙父憂其成疾止之乃
以衣蔽牕默觀弗輟承旨閤復於天下士少所許
可及見元用出所為文示之元用輒指其疵復大
奇之薦為國史院編修元用初不習吏事及辟掾
御史臺見事明決吏反倚以為師轉中書省右司

掾除應奉翰林文字遷禮部主事建議上累朝皇
后徽號自是始免稱名改尚書省右司都事轉員
外郎退居任城久之齊魯間從學者甚衆延祐六
年授太常禮儀院經歷於祀事多所裁定會仁宗
崩英宗召禮官議太廟寢室惟元用議稱古授翰
林待制陞直學士泰定二年授太子贊善轉禮部
尚書兼經筵官再拜翰林侍講學士天歷二年代
祀曲阜孔子廟還俄卒賜鈔五千緡追封東平郡
公諡文獻有詩文集
四十卷號超然集

次韻馬伯庸

灤水橋邊御道西
酒旗閒挂暮簷低
春從綠樹陰中老
雲補青山闕處齊
畫戟遙臨青瑣闥
紫駟解惜錦障泥

鸞凰自為明時出宜傍上林高處栖

秋懷

沙磧秋高宛馬肥哀笳一曲塞雲飛南鄉兒女應相念
過盡征鴻猶未歸

熊太古

豫章人朋來之季子也兄曰承先象先而太古能世其家學

送復上人遊吳

二月鍾陵花滿烟袈裟東上木蘭船地浮彭蠡江聲轉

山入姑蘇海氣連千里從師應未晚五湖為客謾多年
遙知後夜相思處坐看中天好月圓

韓性

字明善紹興人其先居安陽宋忠獻王穉圭其八
世祖也高祖扈從南渡遂家于越性天資警敏七
歲讀書數行俱下九歲通小戴禮作大義操筆立
就及長博綜羣籍為詩文自成一家四方問字者
戶屨至無所容延祐初詔用科舉取士凡以文法
請益者得其心傳義理自勝輒掇魏科憲府嘗舉
性為教官謝曰幸有先人之薄田可具饘粥讀書
砥行無媿古人足矣祿仕非所願也年七十有六
卒所著有禮記說詩音擇書辨
疑郡志及文集共二十餘卷

宛委山

秦山幾千仞翠入蓬萊城城中望山色明暗分陰晴老夫散策山前路為愛看雲不歸去仰看驚怪鷺飛來回頭忽見雲生處崦中孤起如炊烟乘風騰上蒼崖巔巔巔宿雲喜迎接橫空一幅兜羅綿天風吹散銀千縷淡處是烟濃是雨雲師拗怒不肯回露出峰頭尺來許一雨三日溪水肥老夫欲歸不成歸雲師知我慘不樂故出小譎相娛嬉老夫作詩一笑領舉袖收雲散空迴倚

松叫絕山下人仰看雲峰起山頂

陽明洞

洞天深窅行客疑飈輪碧簡誰能稽倚松長嘯巖壑動
放懷未必令人非石氣盤空散成霧檜子無風落青雨
草間欲問苗龍壇薜荔鱗鱗絡銅虎

謝端

字敬惠蜀之遂寧人宋末避兵江陵因家焉端五
歲能吟詩十歲作賦稍長與宋本齊名時號謝宋
荆南宣尉史杜薦之姚樞樞與論文奇之每語人
曰後二十年若謝端者豈易得哉延祐五年擢進

士乙科授承事郎同知湘陰州事歲滿入為國子
博士遷太常博士尋除翰林修撰陞待制國子司
業翰林直學士至順元統以來制冊多出其手預
修文宗明宗寧宗三朝實錄時稱其有史才年六
十二卒

題滋溪子書堂

趙之川濔浸淩易恒涇泝洑各異出惟滋有溪亦是匹
或伏或見乃不容不能百里濔是從混混千里俱朝宗
予曩涉河觀大江踔雲蕩日怒擊撞歸視子滋嶺之瀧
是滋名揚子所始有田有廬水之溪有堂三楹庠非侈

中經子史堂右左高曾遺子以自課子迺善繼志不惰
鬼今撫古挾怪奇泓涵演迤吐為詞副墨往往傳京師
羸金青紫來亦偶滋溪有源子有後斯堂斯書可世守

烏雅子敬

本輝和爾人僑涿郡以字行官平章雅耽詞翰有別業在山中極水木亭榭之勝見虞伯生所題詩

題李龍眠青宜結三馬圖

古人畫馬形與骨今人畫馬色與肉唐有韓幹筆意高
宋有龍眠可相續今朝偶見西馬圖眼如圓鈴膝團麴

短駿兩耳雙竹批風入四蹄如鐵蹄宗伯老蘇亦閒雅
贊以詩文過金玉嗚呼安得九方皋見此應須少回矚

宋元詩會卷七十四